



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ԻՐԱՎԱԲԱՆԱԿԱՆ ՎԱՐՉՈՒԹՅՈՒՆ
ՎԱՐՉԱԿԱՆ ԱԿՏ N 1509035
ՀԱՐԿԱՅԻՆ ՊԱՐՏԱՎՈՐՈՒԹՅՈՒՆՆԵՐԻ ՀԱՇՎԱՐԿՄԱՆ ԵՎ
ԳԱՆՁՄԱՆ ԱՌԱՋԱԴՐՄԱՆ ՎԵՐԱԲԵՐՅԱԼ

08 սեպտեմբեր 2020թ.

ք. Երևան
(կազմման վայրը)

Ակտի հասցեատեր

«Արկադի-Վլադիմիր» ՍՊԸ

(անհատ ձեռնարկատիրոջ անունը, ազգանունը (անհատ ձեռնարկատեր նշումով) կամ իրավաբանական անձի անվանումը)

0	2	2	0	6	1	0	8
---	---	---	---	---	---	---	---

(հարկ վճարողի հաշվառման համարը՝ ՀՎՀՀ-ն)

ք. Երևան, Տարոնցի 2 բ

(անհատ ձեռնարկատիրոջ հաշվառման հասցեն կամ իրավաբանական անձի գրանվելու վայրի հասցեն)

Խախտման նկարագրությունը

ՀՀ ՊԵԿ ՀՕՀ վարչության պետի 11.06.2020թ. թիվ 1509035 որոշման հիման վրա «Արկադի-Վլադիմիր» ՍՊ ընկերության նկատմամբ իրականացված օպերատիվ հետախուզական միջոցառումների արդյունքում պարզվել է հետևյալը.

1.«Արկադի-Վլադիմիր» ՍՊ ընկերության աշխատակից Հմայակ Թադևոսյանը 10.08.2020 թվականին ժամը 12:35-ի սահմաններում առանց օրենքով նախատեսված համապատասխան ուղեկցող փաստաթղթի ք. Երևան, Հյուսիսային փողոց թիվ 2 հասցե է տեղափոխել ընդհանուր 100.000 ՀՀ դրամ արժողությամբ 2 հատ «ՏԴ 75» տրակտորի ռեդուկտոր պահեստամաս:

Վերոգրյալը հաստատվում է «Արկադի-Վլադիմիր» ՍՊ ընկերության տնօրեն Վլադիմիր Սաֆիրիդի 10.08.2020 թվականի գրավոր հայտարարությամբ:

ՀՀ ՊԵԿ տեղեկատվական բազայի ուսումնասիրության արդյունքում պարզվել է, որ 10.08.2020 թվականին ժամը 12:35-ի դրությամբ տեղափոխվող պահեստամասերի համար Ընկերության կողմից համապատասխան հաշվարկային փաստաթուղթ դուրս չի գրվել:

2. Իրականացված օպերատիվ հետախուզական միջոցառումների արդյունքում պարզվել է նաև, որ «Արկադի-Վլադիմիր» ՍՊ ընկերությունը ք. Երևան, Հյուսիսային փ.

2 հասցեում գտնվող Ընկերությանը պատկանող արտադրամաս հանդիսացող շինության հարթ տանիքի վրա կառուցել է 309.12 մ² մեկլանջանի թեք տանիք:

Նշված շինարարության վերաբերյալ «Արկադի-Վլադիմիր» ՍՊ ընկերության տնօրենի կողմից ներկայացվել է շինարարության իրականացման համար անհրաժեշտ ապրանքների ձեռք բերման հարկային հաշիվները, ք. Երևան, Հյուսիսային 2 փողոց հասցեում գտնվող շինության սեփականության վկայականի պատճեն, ինչպես նաև կադաստրային և սկզբնական արժեքների վերաբերյալ համապատասխան փաստաթուղթը:

Թիվ 1509035 արձանագրությունների հիման վրա 10.08.2020թ-ին հարուցվել է վարչական վարույթ: Կողմը, պատշաճ ծանուցված լինելով, չի ներկայացել վարչական վարույթին: Գործում առկա չեն լրացուցիչ ապացույցներ, չեն ներկայացվել միջնորդություններ:

Այսպիսով, «Արկադի-Վլադիմիր» ՍՊ ընկերության կողմից սույն ակտի 1-ին կետով նկարագրված արարքով խախտվել է ՀՀ հարկային օրենսգրքի 57-րդ հոդվածի 1-ին մասի պահանջները, ըստ որի ՀՀ տարածքում մատակարարվող կամ տեղափոխվող՝ շարժական, նյութական գույք հանդիսացող ապրանքների (բացառությամբ հանրային ծառայություններ մատուցող հարկ վճարողների կողմից հանրային ծառայությունների ենթակառուցվածքները շահագործելու և (կամ) սպասարկելու նպատակով տեղափոխվող ապրանքների, Կառավարության սահմանած ցանկում ներառված ոլորտներում գործունեություն իրականացնող հարկ վճարողների կողմից տեղափոխվող հիմնական միջոցների, ինչպես նաև խողովակաշարերով և էլեկտրահաղորդման գծերով ապրանքների և արտարժույթի) մատակարարումը կամ տեղափոխությունը պարտադիր կարգով իրականացվում է ուղեկցող փաստաթղթերով:

Կատարված խախտման համար պատասխանատվություն է նախատեսված ՀՀ հարկային օրենսգրքի 410-րդ հոդվածի 1-ին մասի 1-ին կետով, ըստ որի «Օպերատիվ-հետախուզական գործունեության մասին» ՀՀ օրենքով սահմանված կարգով իրականացվող օպերատիվ-հետախուզական միջոցառումների ընթացքում ապրանքների մատակարարման կամ տեղափոխության փաստաթղթավորման համար Օրենսգրքով սահմանված պահանջների խախտման՝ Օրենսգրքով սահմանված պահանջները չբավարարող ուցեկցող փաստաթղթով կամ առանց ուղեկցող փաստաթղթի ապրանքների մատակարարման կամ տեղափոխության հայտնաբերման դեպքում, բացառությամբ սույն հոդվածով սահմանված դեպքերի, խախտման հիմք հանդիսացող գործարքի կամ գործողության մասով՝ գանձվում է տուգանք այդ ապրանքի գնի (արժեքի) 50 տոկոսի չափով, բայց ոչ պակաս 200 հազար դրամից:

Տվյալ դեպքում «Արկադի-Վլադիմիր» ՍՊԸ-ի կողմից խախտումը վերջին 1 տարվա ընթացքում կատարվել է առաջին անգամ: Ապրանքների ընդհանուր գումարը կազմում է 100.000 ՀՀ դրամ, որի 50 տոկոսը կազմում է 50.000 ՀՀ դրամ, ուստի օրենսդրական պահանջից ելնելով «Արկադի-Վլադիմիր» ՍՊԸ-ի նկատմամբ կիրառելի է 200.000 ՀՀ դրամի չափով տուգանք:

ինչ վերաբերվում է սույն ակտի 2-րդ կետով նկարագրված «Արկադի-Վլադիմիր» ՍՊ ընկերության կողմից իրականացված իրավախախտմանը անհրաժեշտ է նշել որ.

Համաձայն «Լիցենզավորման մասին» ՀՀ օրենքի 43-րդ հոդվածի 1-ին մասի՝ գործունեությունը համարվում է լիցենզավորման ենթակա, եթե այն ընդգրկված է նույն հոդվածում արտացոլված լիցենզավորման ենթակա գործունեության աղյուսակում: Նշված աղյուսակի 17-րդ կետի 3-րդ ենթակետում ընդգրկված է շինարարության իրականացում (բացառությամբ շինարարության թույլտվություն չպահանջող աշխատանքների,...):

ՀՀ կառավարության 19.03.2015 թվականի թիվ 596-Ն որոշման 4-րդ Հավելվածի 1-ին ցանկի 1-ին կետի համաձայն՝ Սույն ցանկում ներառված են օրենքով և Հայաստանի Հանրապետության կառավարության 2015 թվականի մարտի 19-ի N 596-Ն որոշման N 1 հավելվածի (այսուհետ՝ N 1 հավելված) 26-րդ կետի 1-ին ենթակետով, 27-րդ կետի 1-ին ենթակետով և 136-րդ կետով սահմանված՝ շինարարության թույլտվություն չպահանջող ընթացիկ նորոգման, ներքին հարդարման, բարեկարգման և այլ շինարարական աշխատանքները:

Նույն ցանկի «Ընթացիկ նորոգում և ներքին հարդարման աշխատանքներ» վերտառությամբ գլխի 6-րդ կետի Ժ ենթակետով նշված է՝ կտուրների մասնակի (կտուրի ընդհանուր մակերեսի մինչև 30 տոկոսը) փոխում:

Տվյալ դեպքում Ընկերության կողմից ք. Երևան, Հյուսիսային փ. 2 հասցեում գտնվող շինության հարթ տանիքի վրա կառուցվել է 309.12 մ² մակերեսով մեկլանջանի թեք տանիք, որի կառուցման համար ՀՀ կառավարության 19.03.2015 թվականի թիվ 596-Ն որոշման 4-րդ Հավելվածի 1-ին ցանկի 1-ին կետի համաձայն պահաջվում է շինարարության թույլտվություն, ուստի և «Լիցենզավորման մասին» ՀՀ օրենքի 43-րդ հոդվածի 1-ին մասի համաձայն ենթակա է լիցենզավորման:

Մինչև սույն ժամանակ, անհրաժեշտ է նշել, որ ՀՀ կառավարության 02.07.2009 թվականի թիվ 777-Ն որոշման 1-ին Հավելվածով սահմանված կարգի 6-րդ կետի համաձայն՝ Քաղաքաշինության բնագավառում լիցենզիայի ներդիրները տրամադրվում են ըստ հետևյալ ոլորտների՝ 1) բնակելի, հասարակական և արտադրական.2) տրանսպորտային.3) հիդրոտեխնիկական.4) էներգետիկ.5) կապի:

Նույն կարգի 5-րդ կետի համաձայն՝ անձը սույն կարգի 6-րդ կետով սահմանված ցանկացած ոլորտում կարող է զբաղվել շինարարության իրականացման գործունեությամբ, եթե նա ստացել է շինարարության իրականացման (բացառությամբ շինարարության թույլտվություն չպահանջող աշխատանքների և «Լիցենզավորման մասին» Հայաստանի Հանրապետության օրենքի 43-րդ հոդվածով հաստատված աղյուսակի 17-րդ բաժնի 2-րդ կետով նախատեսված այլ դեպքերի) գործունեության լիցենզիա և լիցենզիային կից համապատասխան ոլորտի աշխատանքներ իրականացնող պատասխանատու անձի (անձանց) լիցենզիայի ներդիր (ներդիրներ):

Տվյալ դեպքում ՀՀ ՊԵԿ տեղեկատվական բազայի ուսումնասիրության արդյունքում պարզ է դառնում, որ «Արկադի-Վլադիմիր» ՍՊ ընկերությանը 25.07.2005

թվականին քաղաքաշինության բնագավառում տրամադրվել է թիվ ՔՊԼ 9574-01-2.1 լիցենզիան՝ թիվ 9574-02 տրանսպորտային ներդիրով, որով ք. Երևան, Հյուսիսային փ. 2 հասցեում գտնվող շինության հարթ տանիքի վրա 309.12 մ² մակերեսով մեկլանջանի թեք տանիք կառուցել չէր կարող:

Ամբողջ վերագրյալը հիմք ընդունելով՝ վարչական վարույթն իրականացնող մարմինը գտնում է, որ «Արկադի-Վլադիմիր» ՍՊԸ-ի կողմից առանց օրենքով նախատեսված համապատասխան լիցենզիայի իրականացվել է լիցենզավորման ենթակա գործունեություն:

ՀՀ հարկային օրենսգրքի 408-րդ հոդվածի 1-ին մասի համաձայն՝...«Օպերատիվ-հետախուզական գործունեության մասին» Հայաստանի Հանրապետության օրենքով սահմանված կարգով իրականացվող օպերատիվ-հետախուզական միջոցառումների արդյունքում հայտնաբերված՝ «Լիցենզավորման մասին» Հայաստանի Հանրապետության օրենքին համապատասխան լիցենզավորման ենթակա գործունեությունն առանց լիցենզիայի իրականացնելու ... դեպքում գործունեության յուրաքանչյուր տեսակի մասով կազմակերպությունից կամ անհատ ձեռնարկատիրոջից գանձվում է տուգանք՝ լիցենզիայի կամ թույլտվության տրման կամ ծանուցման ենթակա գործունեությամբ զբաղվելու իրավունք ձեռք բերելու համար օրենքով սահմանված պետական տուրքի դրույքաչափի տասնապատիկի չափով, բայց ոչ պակաս 500 հազար դրամից:

Միևնույն ժամանակ ՀՀ հարկային օրենսգրքի 408-րդ հոդվածի 3-րդ մասի համաձայն՝ սույն հոդվածի 1-ին և 2-րդ մասերով սահմանված խախտումներ հայտնաբերվելու դեպքերում խախտումներ կատարած կազմակերպությունից կամ անհատ ձեռնարկատիրոջից գործունեության յուրաքանչյուր տեսակի մասով գանձվում է նաև լիցենզիան տալու կամ ծանուցման ենթակա գործունեությամբ զբաղվելու իրավունք ձեռք բերելու համար օրենքով սահմանված պետական տուրքի (տարեկան պետական տուրքի գանձման օբյեկտի դեպքում՝ մեկ տարվա պետական տուրքի) դրույքաչափին համապատասխան գումարի չափով վնասի հատուցում:

«Պետական տուրքի մասին» ՀՀ օրենքի 19-րդ հոդվածով սահմանվում են լիցենզավորման ենթակա գործունեություն իրականացնելու նպատակով լիցենզիաներ տալու համար պետական տուրքի դրույքաչափերը:

Նշված հոդվածի 16-րդ կետի 16.2 ենթակետի համաձայն շինարարության իրականացման համար յուրաքանչյուր ներդիրի համար՝ տարեկան պետական տուրքը հաշվարկվում է՝ տարեկան բազային տուրքի 80-ապատիկի չափով:

«Պետական տուրքի մասին» ՀՀ օրենքի 8-րդ հոդվածի համաձայն պետական տուրքի դրույքաչափերը սահմանվում են գնահատման ենթակա գույքի արժեքի կամ սույն օրենքով սահմանված բազային տուրքի նկատմամբ: Բազային տուրքի չափ է սահմանվում 1.000 դրամը:

Տվյալ դեպքում «Արկադի-Վլադիմիր» ՍՊ ընկերության կողմից խախտումը վերջին 1 տարվա ընթացքում կատարվում է առաջին անգամ: Օրենքով սահմանված պետական տուրքը հաշվարկվում է 80.000 ՀՀ դրամ, որի տասնապատիկը կազմում է 800.000 ՀՀ դրամ, ուստի օրենսդրական պահանջից ելնելով «Արկադի-Վլադիմիր» ՍՊ ընկերության նկատմամբ կիրառելի է 800.000 ՀՀ դրամի չափով տուգանք և 80.000 ՀՀ դրամ գումարի չափով վնասի հատուցում:

Ելնելով վերոգրյալից և ղեկավարվելով ՀՀ հարկային օրենսգրքի 428-րդ հոդվածի 1-ին մասով, ՀՀ ՊԵԿ նախագահի 28.08.2019թ. N 562-Լ հրամանով.

Որոշեցի

1. Հաշվարկել և «Արկադի-Վլադիմիր» ՍՊ ընկերությանը գանձման առաջադրել 1.000.000 ՀՀ դրամի չափով տուգանք և 80.000 ՀՀ դրամի չափով վնասի հատուցման գումար, որպես հարկային պարտավորություն, համաձայն ստորև ներկայացված աղյուսակի՝

	Վճարման ենթակա գումար (դրամ)	Վճարման ուղղությունը	հաշվի համարը
Հարկային օրենսգրքի 410-րդ հոդվածի 1-ին մասով սահմանված տուգանք ընդամենը, որից՝	200.000	X	X
Հարկային օրենսգրքի 408-րդ հոդվածի 1-ին մասով սահմանված տուգանք ընդամենը, որից՝	800.000	X	X
Հարկային օրենսգրքի 408-րդ հոդվածի 3-րդ մասով սահմանված վնասի հատուցման գումար,	80.000	X	X
Ընդամենը վճարման ենթակա գումար	1.080.000	Պետական բյուջե	900008000490

2. Ընդունել ի գիտություն՝

1) Սույն վարչական ակտն օրենքով սահմանված ժամկետում անբողոքարկելի դառնալուց հետո՝ օրենքով սահմանված ժամկետում վարչական ակտով առաջադրված տուգանքը չվճարվելու դեպքում, ենթակա է հարկադիր կատարման:

- 2) Սույն վարչական ակտն ընդունված է համարվում ստորագրվելու օրվանից և ուժի մեջ է մտնում հասցեատիրոջն իրազեկելուն հաջորդող օրվանից:
- 3) Սույն վարչական ակտն ուժի մեջ մտնելուց երկամսյա ժամկետում կարող է բողոքարկվել վարչական կամ դատական կարգով:
- 4) Սույն վարչական ակտը կազմվել է երեք օրինակով:

ԻՎ պետ Արման Մնացականյան

Վարչական ակտն ընդունող պաշտոնատար անձի
պաշտոնը, անունը և ազգանունը



[Signature]
ստորագրությունը

Կ.Տ.

Ստացա ակտի մեկ օրինակը

ընդամենը 6 էջ

Վլադիմիր Սաֆիրիդի

Ֆիզիկական անձի անունը, ազգանունը
(անհատ ձեռնարկատիրոջ դեպքում՝ անհատ
ձեռնարկատեր նշումով) իրավաբանական անձի գործադիր
մարմնի ղեկավար (գրագրության ընդունման համար
պատասխանատու անձ՝ հաշվով առաքման դեպքում)

ստորագրությունը

2020թ.